

四庫全書

集部

欽定四庫全書

滄溟集卷十二

明 李攀龍 撰

七言排律

郡齋同元美賦得明字

落日千山短髮明，蕭條轉見故人情。
時危小郡徵求少，秋到高齋卧理清。
豈謂文章妨遇合，深知偃蹇負平生。
論心對我杯中物，握手看他世上名。
遂使浮雲愁大陸，何來二子在孤城。
風塵如此仍為守，愧爾新詩滿帝京。

送歷城李明府入計

五陵佳氣薊門東，此地車書四海同。
葉令遠為朝會使，漢家新起建章宮。
君王受計當天卜，月朔垂衣出禁中。
臺史莫疑鳬屨至，都人已識馬能工。
三齊郡國推高第，百里絃歌播大風。
清問即求封禪草，好文似薦揚雄。

題徐子與門生汪惟一竹邱圖

靈邱隱者一逃名，萬竹臨江見底清。
徙倚七賢相寄傲，便娟二女重含情。
葛陂詎信雙龍影，嶰谷空傳五鳳聲。

風雨長教秋色駐冰霜兼與歲寒盟投竿渭水才堪老
受簡梁園賦已行願得此君開蔣徑不妨佳客醉宜城
浮雲西北來何莫今日東南美自并截作武陵溪上笛
方知馬援有門生

留子與署中

杭城落月早潮生憲府松杉風亂鳴伏枕待三從劾免
移文滿百不留行何人更許彈冠會唯爾還堪倒屣迎
十載寒溫無長物一時出處有餘情酒斟白玉吳姬色

賦擲黃金楚客聲大抵冥鴻心自遠曾來老驥氣難平
浮雲在昔懸秦望北斗依然捧漢京更挾江湖纔是傲
交論冰雪未為清官聯西省聞題柱家本同鄉見請纓
誰似兩朝銜寵遇它如群少失縱橫樽前且抗持螯手
世上空傳染翰名須聽松杉風再起晚潮乘月到杭城
與劉憲使過子與大佛寺

西湖斜日淨風烟北嶺蒼莨出半天磴道乍從空外轉
樓臺已入鏡中懸塔分西域銅餅勢石紀秦官錦纜年

白社但須彭澤酒青山不用華家錢
波搖玉樹堪雙映月上珠林好獨眠
我輩自狂君莫訝平生未敢謬周旋
五言絕句

寄殿卿

一作山中客蓬蒿自滿廬舊遊誰獨往
新著復何書

別意

朝來送歸客復此長河湄立馬折楊柳
已無前日枝

山中

君去何時歸山中春草夕莫將白雲廬不及紅塵陌

贈元美

共擬懷人作先成幼婦篇微音知者少佳句法誰傳

寄登宗秀才茂登池亭

二首

笑此杯中物從他世上名黃金結客盡誰識濟南生

其二

窻中采蓮舟落日菱歌起坐見沆沙人紅顏照秋水

渡易水贈伯承

匕首腰間鳴蕭蕭北風起平生壯士心可以照寒水

郡齋同元美賦得傍字

三載邢州客看人道路傍風塵君自見誰愛接輿狂

酬郭子坤感懷

四首

懷壁如明月連城未肯開君王終見賞且為守蘭臺

其二

若問浮生事風塵病裡過開樽看漸少伏枕似還多

其三

何來雙鬢雪五月鏡中寒便欲煩君鑷蕭蕭不可看

其四

不須婚嫁畢始作尚平遊五嶽年年在浮雲處處愁

戲呈子坤

三首

聞君攜愛妾辛苦事求仙自繡浮邱鶴長齋子晉前

其二

家有秦臺女青雲路不遙但愁明月夜天上喚吹簫

其三

丹竈幾時開妝成倚鏡臺不須嗔竊藥本自月中來

病中贈殿卿

二首

夜來殊不病那得似維摩玄度談名理支公奈爾何

其二

玉兔操金杵誰知擣藥年豈應天上住不有病神仙

冬日

四首

憔悴江湖上行吟雨雪寒不逢漁父問誰作楚臣看

其二

日澹平陵城寒高華不注北風湖上來雪片大如鷺

其三

客來堪自見酒盡且須酤不是南山色貧家一事無

其四

風雪不出門苦吟何時已沽酒城中還先生擁褐起

立春

二首

綵花可憐色為報漢宮春今日文園客依然四壁貧

其二

駘蕩還春色蕭條亦世情不然三徑裡豈愛蔣元卿

漫成

二首

有酒但須飲無世不可避方其潦倒時何與傍人事

其二

翟公既罷官人棄理亦賤殷勤莫署門交情不必見

桃花嶺

一度桃花嶺烟霞處處新縱迷源上路猶似武陵人

丁香灣

平潭澹不流寒影群峰集斜陽一以照彩翠忽堪拾

春日自戲

自從移疾後誰謂主恩疎每及山林士天顏滿薦書

殿卿示樂府序小詩報

知音千載事君遠賞心同從此三都賦人傳左太沖

羽林郎

從軍少年場富貴歸故鄉一拜羽林騎鞍馬自生光

羅敷曲

春日照城隅羅敷陌上趨自能停五馬不是使君愚

山房書壁

二首

夏日山房清田作稍就次銜杯自有真高枕元吾事

其二

鄰翁幸相勞斗酒不須滿且持伏雌還視君牀下卵

歲杪再得殿卿書却寄

連札鴈池來春風錦字開似看嵩少雪把酒上平臺

答寄龍巖卿

白首知經術青袍見主恩為尋揚子宅不到五侯門

和題郭山人五嶽游囊雜錄

六首

五嶽圖

遠遊何所佩五嶽真形圖怪爾煙霞裏精光互有無

杖

十載相攜處白雲知幾重莫經葛陂道風雨去為龍

袖

夜投東林寺北風雪大作捫蝨對山僧衲衣不堪著

瓢

山中無供養時復飯胡麻不是桃源水何人漱落花

鋤

百草各爭芳蘭生詎能邪竭來深谷中我鋤還自荷

觚

醉來市上眠我觚不離手本是高陽徒逢人時乞酒

和子與留別

別酒故人同留詩古寺中唯應湖上竹一為起清風

其二

結客五陵東相邀入漢宮
但攜龍劍往不必問雌雄

七言絕句

寄襲勗

白雲湖上白雲飛
長白山中去不歸
君在幾峰秋色遍
何人共結薜蘿衣

惆悵詞

休將翡翠綰金針
不折芙蓉綴玉簪
誰見雲中雙比翼

空傳月下兩同心

送殿卿

莫辭杯酒薊門春
匹馬明朝客路新
陌上少年君自見
相逢誰是眼中人

送劉戶部督餉湖廣

五首

洲邊處士題鸚鵡陂
上公孫擁驕驕
到日夏雲生七澤
愁時秋色滿三湘

其二

馬上春風白接羅
花開應醉習家池
鹿門耆舊何人在
今日襄陽異昔時

其三

漢江春水竟陵東
江樹蒼蒼繞沛宮
父老只今猶望幸
君王按劍顧雲中

其四

洞庭仙使日相乘
君自扁舟似李膺
江雨茫茫江草徧
不知何處是巴陵

其五

錦帆南入楚雲重
江上遙看衡嶽峰
落日蒼茫秋不斷
青天七十二芙蓉

與元美集李郎中賦示謝生

仙郎歌動白雲秋
酒滿金樽月滿樓
借問西園飛蓋客
座中誰不似應劉

送吳郎中讞獄江西

三首

春風躍馬出長安
送別江南路渺漫
共說豐城龍劍氣

到時還向獄中看

其二

廬山北望楚天分
君去揚帆入綵雲
草色秋迷彭蠡澤
不知何處弔番君

其三

三十三峰淦水陰
中藏玉筍白雲深
自從歸去神仙尉
秋草茫茫不可尋

席上鼓飲歌送元美

五首

翩翩白馬度秋風
共醉胡姬酒肆中
舞劍吹筳歌出塞
送君朝發薊門東

其二

落日銜杯薊北秋
片心堪贈有吳鉤
青山明月長相憶
白草寒雲迴自愁

其三

風色蕭蕭易水寒
荆卿七首入長安
憐君更向江南去
此地何人意氣看

其四

青楓搖落氣悲哉
客有將歸張翰才
東望三吳秋色裡
掛天帆影大江來

其五

碧天無盡白雲孤
到日扁舟落五湖
不見薊門秋草色
愁心明月滿姑蘇

雪後憶元美

雪後千門月色開
故人遙憶子猷回
饒他已盡山陰興

半夜還須載酒來

送子相歸廣陵

七首

茂陵消渴卧詞臣
搖落秋風白髮新
漢主豈無金掌露
馬卿元是倦遊人

其二

相逢杯酒薊門關
腰下并刀明月環
開匣贈君當落日
能令秋色滿燕山

其三

少年裘馬結交場壯歲功名竹帛光
海內黃金看意氣人間白雪見文章

其四

薊北青山照別卮請君聽我秋風辭
揚州十月梅花發江上春光好贈誰

其五

白雲無盡楚天寒鴻鴈蕭蕭楓樹丹
楊子月明愁裡度蕪城雨色夢中看

其六

廣陵秋色雨中開
繫馬青楓江上臺
落日千帆低不度
驚濤一片雪山來

其七

廣陵城上秋瀟瀟
濤聲欲來風色驕
聞道蹴天三百里
不知何似浙江潮

再別子與

四首

徐卿寵送酒如河
半醉當筵楚調歌
握手燕山春草色

絨書西省白雲多

其二

馬上垂楊綰別愁
樽前斜日為相留
明朝何處風塵吏
回首青雲是舊遊

其三

薊門山色雨中開
三月漁陽春水來
愁殺故人看錦字
白雲秋樹滿燕臺

其四

知君起草建章宮
每見徵書問畫熊
在昔漢臣多領郡
黃金先賜右扶風

留別吳舍人

三首

舍人書札五雲開
應笑風塵減吏才
池上鳳凰今不見
何因得下郡城來

其二

檐帷明日罷朝天
擬向風塵避少年
君自楚人諳故事
于今白雪有誰傳

其三

薊門春色送歸愁
楚客思家屬倦遊
借問何人賦搖落
白雲依舊洞庭秋

塞上曲四首送元美

燕山寒影落高秋
北折榆關大海流
馬上白雲隨漢使
不知何處不堪愁

其二

漢兵圍合左賢王
吹角千山夜有霜
君試狐奴城上聽

豈堪秋色滿漁陽

其三

西出居庸大漠開
胡塵遙暗白登臺
愁看塞上蕭條色
落日秋風萬里來

其四

白羽如霜出塞寒
胡烽不斷接長安
城頭一片西山月
多少征人馬上看

留別子與子相明卿元美

四首

青雲如舊滿燕關
病客風塵且自還
到日郡齋春酒熟
城頭何限太行山

其二

使君千騎自東方
回首春雲五鳳凰
此日主恩曾不淺
還容長孺卧淮陽

其三

總為風塵去住難
黃金臺上醉相看
翛然落日離歌起
忽爾燕山白雪寒

其四

莫道休官意不真三年為郡苦風塵青雲縱有憐才客
白眼終非解事人

於郡城送明卿之江西

四首

江上青山滿謫居還家莫戀武昌魚君王日下求賢詔
憶爾還開諫獵書

其二

青楓颯颯雨淒淒秋色遙看入楚迷誰向孤舟憐逐客

白雲相送大江西

其三

長安二月綰垂楊為爾踟躕五驕驕今日故人投轄地
况逢山色滿邢襄

其四

高齋秋色滿西山梅福當年北抱關君到豫章勞問訊
漢家遷客幾人還

郡齋同元美賦得橋字

山色秋停使者輶孤城何處不蕭條
請看襄子宮前水
依舊東流豫讓橋

懷元美

瑯琊山上越王臺秋色高臨海色開
莫向中原看落日
浮雲萬里為君來

懷明卿

豫章西望彩雲間九派長江九疊山
高卧不須窺石鏡
秋風憔悴侍臣顏

懷子相

越王城上黯銷魂
萬里秋風動薊門
君自平生稱國士
南遷豈負信陵恩

懷子與

青山忽送七閩秋
大海遙連百粵流
落日孤城風雨合
褰帷何處不堪愁

寄伯承

才子含香滿玉墀
仙郎賦就幾人知
只今西省空相憶

揚馬風流自一時

寄茂秦

誰惜虞卿老去貧
平原食客一時新
懷中白璧如明月
何處還投按劍人

寄順甫

江漢秋風萬里生
浮雲不見鄂王城
于今楚調無人和
憶爾還高白雪情

寄余德甫

使者銜恩入楚天
秋風吹動豫章船
孤帆遙掛浮雲色
西望長江落日邊

荅殿卿

扁舟歸去五湖春
愁見紅顏掌上新
明月自閑歌舞地
秋風憔悴捧心人

荅元美

蕭條鸚鵡賦初成
偃蹇當年一禰生
屈指中原餘子盡
非君誰見孔融名

汝思見過林亭二

音

五柳陰陰逼酒清一杯須見故人情明朝馬上聽黃鳥
不似樽前喚友聲

其二

自買南山種秫田幾回留客甕頭眠與君今日拚沈醉
莫笑陶家乏酒錢

五日與殿卿遊北渚二

首

青樽畫舫碕湖濱風俗遙傳楚逐臣潦倒只今君自見

那能長作獨醒人

其二

五月五日榴花杯故園故人北渚來君今不飲紅顏去
那有長絲繫得回

酬殿卿長史夏日過飲

四首

蕭蕭風雨北堂寒客似高陽復罷官君但能來長夜飲
不妨人作酒徒看

其二

故人深愧子雲才
風雨茅廬書不開
寂寞已甘車馬絕
君今載酒為誰來

其三

白雲湖上華陽山
那得相看不醉還
明日蓬蒿三徑沒
誰憐長史在人間

其四

美酒新開琥珀光
還堪潦倒故人傍
已拚十日平原飲
怪爾能飛五月霜

九月同殿卿登南山

滿天鴻鴈雨紛紛
濁酒黃花把向君
莫道龍山高會後
風流今少孟參軍

其二

茱萸美酒玉壺殷
此日逢君一醉還
愁見孤城秋色裡
不知風雨遍空山

其三

處處登高白髮新
年年陶令罷官貧
蕭條豈少東籬菊

不見當時勸酒人

其四

黃花蕭瑟雨中寒
搖落東林木葉丹
不是故人能載酒
祇今秋色好誰看

秋日東村偶題

二首

西風蕭瑟病相如
高枕從他世上疎
莫道浮雲多變態
還將秋色到茅廬

其二

五柳青青醉裡春
那能長作折腰人
情知縱酒非生事
昨日罷官今日貧

九月八日東村送元美

濁酒枯魚自不貧
黃花況復席邊新
明朝縱及龍山會
那得長逢落帽人

和荅殿卿冬日招飲田間

二首

白眼風塵一酒卮
吾徒豈足傲當時
城中年少空相慕
說着高陽縱不知

其二

白雲湖上北風寒
茅屋蕭條兩鵝冠
我自能憐華不注
推窗君試雪中看

寄慰元美

二首

幕府千山薊北青
朗陵賓客夜充庭
即今無恙荀文若
著膝猶堪當一星

其二

少婦紅妝玉筯寒
清秋銀燭對闌干
無情最是它鄉月

不就仙郎掌上看

春日聞明卿之京為寄

十載浮雲傍逐臣歸來不改漢宮春
摩挲金馬宮門外誰識當時諫獵人

寄懷元美

塞北江南萬里長
各天兄弟正相望
誰將匹練吳門色
哭作燕山五月霜

仲鳴蒲桃

萬顆蒲桃照玉盤
西施乳滴露華寒
故人更比相如渴
不向金莖夜夜看

王中丞破敵遼陽凱歌四章

匈奴十萬寇遼陽
漢將飛來入戰場
直取單于歸闕下
論功那更數名王

其二

萬里橫行大破胡
沙場西北漢軍孤
不因驃騎能深入
知有陰山瀚海無

其三

再領樓船護海濱
三持節鉞掃邊塵
怪來長得君王寵
自是麒麟閣上人

其四

中丞萬馬下榆關
拂海旌旗破敵還
幕府秋陰連殺氣
散為風雨暗燕山

為劉伯東題王母圖壽太夫人

翩翩五鳳五雲開
客自金門侍從才
六月海東桃又熟

親隨阿母漢宮來

勞別子與

二首

武林山對海門開
不枉登臨酒一杯
十載故人零落盡
有誰還為度江來

其二

馬卿元自漢詞宗
天子同時歎不逢
總為故人邀貴客
故將車馬過臨邛

張明府見惠榴柿

二首

林頭春酒百花香
醉裏誰知柿子黃
想道故人消渴久
秋來為摘滿林霜

其二

誰遣明珠掌上來
秋風吹籠石榴開
若非金谷園中樹
定是河陽縣裡栽

答石史問山中與誰把苦

依然濁酒竹林傍
那道窮途便不狂
白眼生平君自見
可能容易入山陽

見火齊鐙問是右史持入梁

火齊春鐙七采裝誰投明月向梁王也知照乘珠猶在
不是先容不敢張

山中簡許郭


二首

山中酒熟住山中早晚羊何詣謝公
莫道白雲終日在
及看秋色向丹楓

其二

金牛谷裡樹蒼蒼一入千峰但夕陽
浪跡莫愁難問訊

題詩多在朗公房



滄溟集卷十二

欽定四庫全書

集部

滄溟集卷十三

詳校官庶吉士臣柳邁祖

中書臣劉源溥覆勘

覆校官中書臣朱鈐

校對官庶吉士臣嚴福

謄錄監生臣陳振興

欽定四庫全書

滄溟集卷十三

明 李攀龍 撰

七言絕句

遊仙曲

一聽黃竹寫歌鐘
人醉秦臺十二重
琪樹花開巢孔雀
瑤池水煖出芙蓉

過劉簿山齋

萬壑千山入戶重
秋來三徑少人踪
不知君在蓮花府

得似芙蓉第幾峰

宿林泉觀

盥漱焚香坐翠微
煙霞猶在芰荷衣
怪來不作人間夢
一夜寒泉拂牖飛

寄謝茂秦

老去長裾滿淚痕
秋風又曳向何門
可知十載龍陽恨
不道前魚亦主恩

東村同殿卿送子坤赴選

三首

青雲明日羨翻飛應念陶家獨掩扉君最往還知五柳
何曾送客解依依

其二

短褐憐君又遠遊如今白壁好誰酬座中楚客曾三獻
纔說連城淚已流

其三

老去看花上苑春憐君不厭草堂貧預知猿鶴愁無主
更屬南隣卧病人

寄元美

七首

薊門城上月婆娑玉笛誰爲出塞歌君自客中聽不得
秋風吹落小黃河

其二

白雲何處不漫漫欲寄綈袍薊北寒依舊西山秋色裏
知君此日轉愁看

其三

匣裡龍泉北斗文携來燕趙客如雲自言此劒千金買

不是窮交不借君

其四

聞道紅顏鏡裡新
還堪客子闌青春
秋來縱帶風塵色
猶是行吟澤畔人

其五

江南風雨夢扁舟
薊北燕花傍酒樓
無那故人搖落盡
教君何處不悲秋

其六

落魄初看逐客情風流又似棄繻生路傍年少從他問
不必停車說姓名

其七

漁陽烽火暗西山一片征鴻海上還多少胡笳吹不轉
秋光先入薊門關

重寄元美

三首

十載交遊滿帝都五陵年少避呼盧只今惟有張公子
匹馬時時過酒徒

其二

南冠君子繫京華
秋色傷心廣柳車
此地由來多俠客
不知誰是魯朱家

其三

北斗闌干南斗低
啼烏三匝鳳城棲
萬年枝上秋風起
飛入中丞署裏啼

哭子相

四首

故園秋色廣陵間
閩海悠悠自不還
縱使蕪城愁易老

那能長客武夷山

其二

清秋不盡客依依
夢裏闌天掛劍歸
莫向延平津口度
恐驚風雨二龍飛

其三

揚子江寒月影孤
秋風吹落射陽湖
故人欲灑臨江淚
湖上明珠竟有無

其四

大江千里日滔滔秋色遙看入夢勞
莫道故人枚叔少
悲君已厭廣陵濤

答潘潤夫病中見贈

二首

高秋伏枕嵒湖濱憔悴誰憐似楚臣
怪爾紅顏青鏡裏
潘郎本自玉爲人

其二

湖上青山對濁醪故人遙望白雲高
愁中那得無秋興
賦就看君已二毛

湧泉菴

錦陽川上女僧家紅樹蕭蕭白日斜弟子如雲人不見
可憐秋老玉蓮花

輓王中丞

八首

主恩三遣護三邊驃騎功名破敵年不謂漢軍能失利
猶堪起冢象祈連

其二

司馬臺前列栢高風雲猶自夾旌旄屬鏤不是君王意

莫作胥山萬里濤

其三

旌旗海上似雲屯
大將登壇國士恩
白馬只今成過隙
千秋匹練曳吳門

其四

鐵馬蕭蕭日色黃
邊聲殺氣滿漁陽
誰知一夜旌竿折
搖落中丞栢上霜

其五

三月漁陽大出師君王按劍捷書遲鼓聲不為將軍起
豈獨封侯是數奇

其六

莫道江南夢裏遙白楊明日便蕭蕭門人盡愛傷春句
不擬招魂與大招

其七

昨夜烽烟海上青猶聞麾下取龍庭一時雄劍無精彩
遙指燕山落將星

其八

幕府高臨碣石開
薊門丹旄重裴徊
沙塲入夜多風雨
人見親提鐵騎來

別元美

二首

北風吹鴈鴈群呼
泗水西流白日徂
不見浮雲千里色
知它何處是姑蘇

其二

白雲愁色滿吳門
足馬孤舟不可論
一自河梁攜手後

至今猶有未銷魂

戲贈張茂才

二首

自愛花枝掌上紅
蛾眉如月綰春風
須知粉黛隨時變
多恐張郎畫未工

其二

張郎新製合歡衾
醉擁紅顏燭影深
別有洞房雙玉妾
吹簫自和白頭吟

送徐汝思

四首

天涯明日故人疎
莫向樽前歎謫居
最是孤臣偏雨露
君王不問篋中書

其二

漁陽幾載傍胡塵
此日驪歌濟水濱
白首談兵君自見
何須更問請纓人

其三

青樽華髮對銷魂
匹馬孤城日色昏
愛客更爲長鋏引
一時回首孟嘗門

其四

主恩千騎入防秋
幕府遙臨上谷愁
今日故園遷客淚
誰知不是爲封侯

和許史秋日玉函觀

二首

瑤臺十二玉闌干
月出名花映掌寒
自是仙人君不信
只今誰得醉中看

其二

青鳥翩翩錦字通
玉簫秋冷玉函宮
情知洞裏如花女

共指風流許侍中

秋日許郭殷見枉鮑山山莊

玉壺春酒石榴殷此日中林見往還堪是樽前幾知己
那能不愛叔牙山

與三君登樓

誰憐王粲懶登樓病起漳南對客秋自喜賦成多麗句
因知座上有曹劉

和許右史初度村興之作

一瓢春酒望青天誰識箕山武仲賢
我亦潁陽飲牛客猶堪擊壤共堯年

九日示殿卿

牀頭濁酒浸黃花門外蕭蕭五柳斜
此日登樓人盡醉誰知秋色在陶家

襲生緋桃栽

白雲湖上酒家春那更桃花照眼新
今日為栽三徑裏憐君也是武陵人

送子與 五首

北風吹雪雪漫漫
雪裏題詩淚不乾
豈意故人搖落後
逢君五馬入長安

其二

十年高卧白雲寒
嬾借新知錦字看
不是眼中人漸少
那能相憶使君灘

其三

襜帷何處傍風塵
握手江湖白髮新
此去更沽燕市酒

不知誰作和歌人

其四

中原北望九河分
太守揚帆入五雲
莫按腰間鹿盧劍
明珠今日便投君

其五

玉帛徵賢謁建章
潁川軒蓋有輝光
君恩儻許留京兆
不必重來下鳳凰

殿卿別業

二首

負郭田荒勸客耕
隣家酒熟任逢迎
只今何異吳門卒
枉殺梁鴻變姓名

其二

牀頭詩草日生塵
架上長裾嬾着身
自訝閉門無一事
春來擬作緯蕭人

觀獵二首

胡鷹掣銳北風迴
草盡平原使馬開
臂上角弓如却月
當場意氣射生來

其二

十月霜清紫兔肥
浮雲不競鐵驄飛
半酣驅逐諸年少
盼子城東看打圍

酬許右史九日小山見贈

四首

南山秋色照東籬
又是陶家載酒期
彭澤罷來無俗客
何妨不許白衣知

其二

我愛淮王上客賢
小山那在鵲湖邊
開尊共泛金花酒

散帙同吟桂樹篇

其三

十載銜杯望白雲
天涯此日歎離群
重來秋色生雙鬢
更折茱萸插向君

其四

湖上青山遠
郭斜翠微深
處半人家
誰知不解登臨苦
醉殺猶堪藉菊花

寄元美

四首

楚客龍泉照雪霜曾携上國獻君王奈何一閉豐城後
紫氣空干斗北長

其二

憑將白雪寫朱絲總是人間此調悲縱使霓裳君莫管
古來能得幾鍾期

其三

自握明珠掌上愁夜來寒色動隋侯可知按劍人相視
任是銜恩未可投

其四

櫪下長風萬里生誰憐汗血老無成若教一奉瑤池御
八駿如雲不敢鳴

得徐使君所貽王敬美見贈答寄

四首

山中伏枕白雲天江上新詩錦字傳轉向故人三致意
君家兄弟有誰憐

其二

博物張華不易逢十年京洛少從容當時未得豐城劍

已識雲間陸士龍

其三

十載論文畫省開
君家二妙日趨陪
那因見和池塘句
始羨風流小謝才

其四

弱冠文章滿帝城
偶因家難負平生
中原莫恨論交少
海內今無驃騎名

汝寧徐使君

十首

汝海清秋四望開
白雲長在景夷臺
已知千載無枚叔
誰愛風流漢署才

其二

使君爲政雜風騷
遠郡青山照彩毫
不是賦成相倡和
那須更署范功曹

其三

天子分符漢省郎
風烟汝潁更相望
府中但得平輿吏
他郡從教下鳳凰

其四

鴻陂東注汝陽城太守來春出勸耕童子但須騎竹馬
夾車休唱芋魁羹

其五

水如垂瓠抱城流西望千山入楚秋帝謂使君終長者
褰帷不必更閩州

其六

高齋卧理簿書閑掾吏裁詩日往還片月不離桐栢水

白雲偏傍弋陽山

其七

高蓋峻嶒駕楚雲
駢驂五馬五花文
漢庭此日推經術
可是尋常作使君

其八

千騎如雲汝水濱
銅符散冕一時新
身爲漢主分憂吏
何必龔黃好讓人

其九

三河名郡鬱如林
治行看君結主深
但使便宜長得請
守臣無意賜黃金

其十

解道文章老自知
中原病客重相思
故人寥落看如此
再領專城豈後時

寄吳明卿

十首

平臺秋氣鬱蒼蒼
落日登臨一斷腸
若道子虛今未就
當年誰遣客遊梁

其二

梁園高宴日紛紛
帝子風流雅好文
若使平臺賓客在
已知詞賦不如君

其三

高齋只尺小蒙城
三載逍遙傲吏情
不是春風常入夢
誰知蝴蝶等功名

其四

秋色蕭條傍謫居
體中今日定何如
從他幾載風塵吏

不作平津相府書

其五

長吏應憐道路傍
三年叅佐有輝光
縱書下考關何事
不必詩名入薦章

其六

楚娃雙侍玉爲顏
勸酒能歌雉子斑
醉殺休論官不調
古來遷客幾人還

其七

睢陽小吏困逢迎
醉後參差故態生
莫倚甘泉曾獻賦
君今久已罷承明

其八

來自廬山五老峰
梁園賓客更相從
已知無意二千石
出處何如邴曼容

其九

短髮風塵老更繁
青雲何日見飛翻
由來逐客人迴避
遮莫詞垣與諫垣

其十

梁苑無人秋氣悲
吳門回首淚堪垂
知君不盡平生意
海內窮交更有誰

送殷正甫內翰之京

十首

咸池一奏合宮成
帝自垂裳拱玉京
多少侍臣調六琯
須知共作鳳凰鳴

其二

春風忽送漢臣還
再入承明供奉班
怪得文章成五色

朝朝染翰近龍顏

其三

君王賜宴栢梁臺
七字新詩漢體開
首倡自天酬不得
曲終還賴歲星才

其四

漢家詞客滿金門
誰解凌雲感至尊
一出子虛名便起
長卿無日不承恩

其五

詔遣詞臣集漢都明年羽獵大誇胡共憐執戟人猶在
莫問長楊賦有無

其六

十載風流侍從臣歸來依舊帝城春金華殿裡談經客
半是同時獻賦人

其七

帝寵詞臣弄彩毫蓬蒿宮闕五雲高自憐一日成三賦
不分傍人賜錦袍

其八

紫禁清秋五夜閑
金莖玉樹少人間
不知帝遣神仙吏
更直蓬萊第幾山

其九

依舊春風滿建章
重來搦管對君王
即看應制偏承寵
何處新詩不擅場

其十

東觀風流著作郎
滿朝誰不羨恩光
賦成清思如秋水

一片霜毫灑玉堂

促殿卿之官

四首

春色平臺散客愁
淮南桂樹小山秋
身爲一郡風塵吏
借問何如此薄遊

其二

聞道相知滿帝京
時來不得避功名
縱今再補王門客
恰好逍遙遺宦情

其三

白雲湖上酒家春坐愛青山誤此身詩句近來多遠興
那能不作宦游人

其四

夙昔分符結主歡今來相國豈微官也知合有抽簪日
且向山陰雪夜看

酬許使君讀鄙詩見贈

二首

江湖幾載避風塵病裡詩成白髮新不是使君相唱和
一時同調更無人

其二

莫道西施寵最深
館娃宮女正如林
何人不解矜顏色
敢向君王更捧心

少年行 二首

胡姬十五堪當壚
美酒青絲白玉壺
君但携來成一醉
知他誰是霍家奴

其二

裘馬翩翩出建章
青樓日日擁紅妝
纔開春酒茶藤色

說甚金莖露未嘗

早夏示殿卿 二首

長夏園林黃鳥來
百花春酒復新開
主人把酒聽黃鳥
黃鳥一聲酒一杯

其二

湖上青山遶屋斜
蕭條重枉使君車
到來縱遣柴門閉
只在東鄰賣酒家

許使君見過林亭 二首

解衣沽酒豈辭貧
散髮狂歌也自真
林下似君看亦得
誰言嵇阮便無人

其二

濁酒自沽還自把
先生寄傲南窓下
門前五柳漸看長
使君時時來繫馬

謝中丞枉駕見過無惠營草堂貲

四首

夾戶春風五柳斜
遶籬秋色醉黃花
南山只在茅茨外
人道柴桑處士家

其二

車馬紛紛滿四隣
中丞不厭草堂貧
自從一爲蒼生起
高卧如君更幾人

其三

結屋臨湖八九椽
白雲秋色正蕭然
若言長者無車轍
何得中丞乞俸錢

其四

牀頭一卷大玄經
湖上千山閉戶青
儻憶故園能載酒

貧家不讓子雲亭

送潘令之邯鄲

四首

春滿邯鄲十萬家
若爲潘令闢繁華
請看如玉叢臺女
豈讓河陽縣裡花

其二

爲政風流不下堂
漳河春色動宮牆
遙知茂宰鳴琴曲
彈作羅敷陌上桑

其三

趙家和璧舊知名千載秦人說蘭生莫道君才非百里
須將高價抵連城

其四

邯鄲出宰氣何雄佇日徵書奉漢宮製錦但令成五色
如花豈羨鮑家驄

山齋牡丹 三首

醉把名花掌上新空山開處幾迴春西施自愛傾城色
一出吳宮不嫁人

其二

西山風雨錦溪寒
春色沈沈醉牡丹
不是故人裁麗句
那能蕭瑟病中看

其三

青山繚繞樹橫斜
中有柴桑令尹家
白髮幾迴能載酒
春風何處不看花

過殿卿山房詠牡丹

二首

相國園亭種牡丹
枝枝風雨怨春寒
主人車馬城中慣

知傍誰家錦障看

其二

國色宮妝倚檻新
一樽堪自對殘春
即令解語應相笑
何必看花定主人

訪劉山人不值

二首

主人三徑草堂斜
稚子開門勸喫茶
自有白雲看好客
不妨紅葉滿貧家

其二

南窓狼藉半牀書
階下蒼苔罷掃除
似是隣翁邀作社
不然應釣錦川魚

滄溟集卷十三

欽定四庫全書

滄溟集卷十四

明 李攀龍 撰

七言絕句

贈鄭將軍之銅江

四首

漢將承恩意氣多
樓船十道下牂牁
憐君本自山東妙
更許何人繫尉佗

其二

銅柱遙臨幕府高
武陵溪水日滔滔
桃花不及驂騑色

併與春光照錦袍

其三

白羽如林漢主分萬山遙護長官軍
大銅江上門生笛
不是南征不可聞

其四

射策當年捕虜才提兵又度百蠻來
秋霜已避橫戈氣
春鴈應同結陣迴

答殿卿問疾

斜陽殘雪照樓中
忽枉新詩字字工
無那主人便伏枕
十年不肯讓春風

戲問殿卿止酒狀

昨夜春風吹酒香
牀頭甕甕菊脂黃
當壚笑殺如花妾
底事垂涎若箇長

樓上

白雲湖上白雲還
濁酒新詩日日閒
無那蒲樓春雪色
教人常對玉函山

聞鴈得元美兄弟書却寄

春風忽送鴈行迴
病客新銜白雪杯
一度三江聲自苦
君家兄弟寄書來

止酒

五柳先生漉酒巾
蕭然東壁掛青春
遠公此日應相笑
也學蓮花社裏人

答張秀才簡病中見寄

二首

一瓢春酒一漁磯
羨爾江湖老布衣
此日故人誰問疾

柴門深閉雪霏霏

其二

裘馬翩翩自昔時
誰憐華髮卧茅茨
世情一薄如春雪
不是窮交那得知

送金台鄭參戎

二首

征南幕府百蠻遙
擬勒功名寵聖朝
此日漢家銅柱在
何如海上赤城標

其二

帝遣樓船護海鄉，旌旗十萬下東陽。
何來劍氣轅門上，夜夜遙看婺女光。

答殿卿過飲南樓見贈

二首

二月城頭柳半黃，金枝嫋嫋掛斜陽。
已知不及春醪色，自起開尊喚客嘗。

其二

南樓雪後憶離群，湖上銜杯弄白雲。
也道酒如春水薄，尊前無日好無君。

和許長史玉函宮携妓

二首

玉函宮裏列紅顏美酒清尊醉不還
春色自應天上好
那嗔長史出人間

其二

清都花發彩雲深片月高懸玉樹林
此夕應逢秦女醉
新詩偷得鳳簫吟

送右史之京

十二首

漢家高宴栢梁臺千載風雲擁上才
誰得似君珠履貴

親承咳唾九天來

其二

曾遊上國和陽春
華髮重來一曲新
身自楚臣誰不識
蘭臺賓客更無人

其三

一片燕山紫氣中
漢家城闕薊門東
即今天子招賢地
非復當年碣石宮

其四

五雲西北望京華玉帛年年出漢家此去但承明主問
不妨才子更長沙

其五

乞得梁園出漢關那將春色動離顏惟愁不見鄒枚苦
賦就無人解往還

其六

萬國稱藩拱至尊一時詞客出王門但教日奉西園宴
莫道應劉不是恩

其七

金輿山下小清河河上朱樓疊素波此日爲君西北望
浮雲不似客愁多

其八

桃花美酒鳳凰樓公子乘春作宦游寒食不知何處過
總無風雨亦堪愁

其九

胡姬十五漢宮妝夾道楊花撲面香處處紅樓堪繫馬

莫教春色斷君腸

其十

春風忽斷鴈行疎
染翰青雲照錦裾
知爾已傳招隱賦
相思更寄枕中書

其十一

秦女窓前桂葉垂
那堪春色鬪雙眉
君家自種淮南樹
處處淹留好爲誰

其十二

春光明日是長安楊柳青青傍酒寒也自道君爲客好
那應猶作故園看

宿開元寺示諸子

三十年前住此峰白雲流水見相從那知此日東林會
更聽開元寺裏鐘

重寄伯承

桃花不似玉顏紅顧影揚蛾入漢宮纔說長門人便老
黃金無賦買春風

答殿卿潞河旅次見憶之作

十載蕭條作逐臣
長安明日更逢春
那能不醉新豐酒
且自江湖憶故人

錦陽川途中醉歸答劉山人

錦溪人醉接離斜
邀客看花右史家
右史未歸休下馬
長安城裏正看花

答右史於都城見賣牡丹者因憶故園之作

二首

上苑繁華此一時
牡丹偏媚漢宮姿
故園春色無人賞

零落空山只自知

其二

長安何處買花還
玉女窓前兩度攀
可惜漢宮都不管
一枝春色借人間

周象賢明府明卿門人屬感明卿放逐因贈明府

金馬風流漢主恩
一時冠蓋盡王孫
不知澤畔行吟日
那得周郎却在門

贈周象賢明府

漢家當日渡蘭津
銅柱西南盡外臣
才子似君難便得
始知元不爲巴人

爲周直陽題芭蕉仕女圖戲呈吳明卿使君

春盡芭蕉未著花
玉蘭雙倚麗人斜
何如南郡從游日
一面紅妝出絳紗

爲周直陽詣徐使君得報使有感作此贈

二首

使君清怨滿江皋
汝海秋深尺素勞
當日往還門下吏

那知猶有范功曹

其二

使君南國有詩名
屬吏風流思亦清
今日新林還罷郡
幾人猶似在宣城

早春寄吳使君

四首

十載風流動帝都
只今漂泊滿江湖
那能萬里褰帷處
不憶中原一病夫

其二

從他白髮病中生濁酒寧知世上情
纔到蓬蒿人自轉
非干仲蔚欲逃名

其三

越王臺上草萋萋楚客褰帷五馬嘶
那意故人將錦字
春風吹到七閩西

其四

五馬遙臨百粵春漢家遷客虎符新
同時諫獵堪誰在
得領專城更幾人

殿卿乞酒作此寄報 二首

遙傳錦札鴈池來，問我看春醉幾回。
消渴未能常傍酒，乞君携客上平臺。

其二

新開金掌露華香，贈爾梁園喚客嘗。
酒賦若還遺此品，可須浮白勞鄒陽。

寄劉子方斗酒

每到花開憶錦溪，春醪今日爲君携。
山中儻值看花伴，

醉裏新詩好共題

戲東張茂才

羅姑春酒百花香
潦倒張郎自不妨
爲問君家三婦豔
今朝若箇畫眉長

爲許右史悼伎

二首

翩翩春色夢中微
淚盡紅顏濕舞衣
似愛主人能作賦
化爲流雪兔園飛

其二

梁園脩竹孝王栽散入秋風繞吹臺此夜斷腸聽不得
月明池上鴈還來

招張少坤

蕭蕭落木下河千秋老東林白露寒爲報陶家新酒熟
黃花三徑待君看

挽耿蠡縣

二首

百里風雲接帝闈故園春色動芳菲知君自是神仙令
此日雙鳬何處飛

其二

春色孤城病裡看
誰憐白髮漢郎官
蠶吾城下秋風起
千載蕭蕭易水寒

挽楊生

二首

翠羽明珠映掌新
君家長是武陵春
一時紅淚千行下
腸斷君家有幾人

其二

平生裘馬最翩翩
不惜黃金結少年
今日蕭條君不見

白楊秋色有誰憐

感逝示克懋

春風吹動故人情昨夜山陽玉笛聲若使紅顏偏綬冕
誰將白髮老諸生

襲克懋託疾不肯入試賦贈

白髮蕭蕭一布衣秋風搖落鴈南飛如何自聽朱絃絕
此調人間識者稀

十日陶令過東村

樽前無恙滿籬花柳亦蕭蕭映日斜正好故人成一醉
風流那不似君家

子與以服散卧病因賦姬人怨服散三章戲贈
洞房春滿百花明月底紅顏把玉笙道是神仙君不信
人間那得鳳凰鳴

其二

桃花流水赤城山當日劉郎去復還若道不如天上好
何緣二女憶人間

其三

吳姬搗藥楚姬凡獨夜深闌玉兔寒更倚庭前雙桂樹
何人不作月中看

簡許殿卿

玉函山色倚嵯峨北渚清秋已自波我欲與君攜酒去
不知何處白雲多

和許右史寄懷曾水部之作

二首

右史懷人美彩毫華陽秋送白雲高遙知水部開槭處

不獨鍾山照錦袍

其二

鴻書搖落度江來，爲憶風流許掾才。
曾是支公門下客，秋光偏在雨花臺。

病中答寄殿卿

大梁車騎日如雲，客散夷門酒半醺。
更向古人論意氣，不知誰似信陵君。

和聶儀部明妃曲

四首

青海長雲萬里秋琵琶一曲淚先流六宮多少良家子
不到沙場不解愁

其二

玉門關外起秋風雙鬢蕭條傍轉蓬
惟得紅顏零落盡春光只在合歡宮

其三

天山雪後北風寒抱得琵琶馬上彈
曲罷不知青海月徘徊猶作漢宮看

其四

燕支山下幾回春
坐使蛾眉誤此身
二八漢宮含笑入
一時紅粉更無人

重別魏使君

四首

楚客褰帷不可留
陽春一曲更難酬
併將別後蕭條色
寫向君家白雪樓

其二

謝客園林已十春
門前車馬任紅塵
使君不爲憐同調

何處蓬蒿得故人

其三

君家明月楚江干
價動連城海色寒
不是片心還得似
三年那借故人看

其四

海郡爭傳下鳳群
美人爲政有如君
翛然更逐旂帷去
西望蘭臺入五雲

寄謝茂秦

二首

美人春望望陵臺臺下漳河去不回惟有舊時歌舞地
至今風雨自西來

其二

裘馬翩翩四十秋當時雙壁暫相留于今客散平原館
說著還鄉已白頭

和右史悼兒篇

三首

賦罷人傳絕妙辭爭如細柳亂輕絲那知日干行淚
並拂秋風灑鴈池

其二

月出梁園授簡遲
賦成賓客更相疑
如何照乘珠無恙
却得精光異往時

其三

颯颯秋風木葉飛
丹陽長史一霑衣
自憐猶在人間住
玉斧蓬萊去不歸

答右史秋懷見寄

二首

河上秋風鴈影開
樽前明月夜還來
兔園一望渾如雪

人在梁王古吹臺

其二

老去王門混酒徒
陳留賓客避呼盧
不知今日狂何似
曾入高陽會裡無

答殿卿九日見懷

二首

黃花獨傍酒邊開
過鴈秋風繞吹臺
直置霜寒聽不得
何須更自故鄉來

其二

白髮蕭蕭映酒垂他鄉秋色更堪悲不知此日登高處
折得茱萸插向誰

寄許殿卿

二首

夾道楊花撲玉鞍隋堤三月正漫漫知君日向平臺醉
猶作梁園雪裡看

其二

虛傳車騎故園來侍宴無非繞吹臺雪賦幾篇纔脫稿
諸王已報牡丹開

廬城送子與

廬城吹角月輪高
夜色侵燈擁二毛
明發使君從此去
吳門飛雪見綈袍

答元美問余近事

二首

山中還往酒家知
纔到蓬蒿客便疑
縱有少年能問字
也應難見子雲奇

其二

賦罷凌雲氣不降
長楊羽獵妙無雙
老來却解人間事

攤得玄經覆酒缸

和周公瑕猗蘭篇兼呈元美

玉指紅顏擁上春
勞君一顧落梁塵
當時解贈同心句
漢省風流在幾人

寄余仲蔚

吳門月落洞庭孤
何處扁舟釣五湖
我夢三峰秋色裡
不知曾掃華山圖

聞子與欲詣問詩以代柬

二首

謝客江湖已十秋，浮雲華髮共悠悠。
聞君忽憶陽春調，濁酒還開白雪樓。

其二

吳觀峰高練影長，使君千騎下東方。
故人不惜中原色，借爾登臨望故鄉。

白雪樓贈子與

綈袍十載北風寒，又說陽春和者難。
直置樓西華不注，使君能得幾回看。

遣侍兒

孔雀雙飛織素年
蛾眉宛轉使君前
桃花流水人間去
何處春光不可憐

贈梁伯龍

二首

白雪樓高海氣重
吳門詞客遠相從
可知不帶紅塵色
至自清秋日觀峰

其二

太華峰頭玉女壇
別時明月滿長安
不知秋色今多少

君到仙人掌上看

蕭蕭篇哭孫

三首

年年病裡度秋風
雙鬢蕭蕭對轉蓬
今日隣家聞玉笛
不堪吹入思悲翁

其二

西北浮雲白日微
蕭蕭木葉傍人飛
那知十載窮途淚
并向秋風濕我衣

其三

西風玉樹一枝殘
猶自蕭蕭月影寒
白髮只堪供伏枕
那教雙淚更漫漫

謝俞仲蔚寄簞

五柳先生漉酒巾
門無車馬斷紅塵
勞將楚簞遙相問
高卧中原更幾人

九日

黃花白髮病中新
壁上常懸漉酒巾
九日空齋似寒食
更無風雨亦愁人

歲杪得元美兄弟書却寄

二首

北風吹雪雪毵雪裡開緘酒半酣但說王家兄弟好
自應春色滿江南

其二

病起逢春上酒卮江南江北正相思中原謾說先朝事
五子風流自一時

答寄殿卿

平臺春興日堪乘公子相邀賽信陵那得更逢寒食下

高齋獨供伏牛僧

答殿卿代寄正甫

凌雲賦出罷朝天
今日恩深漢帝年
寄語故人楊得意
白頭堪作病相憐

春興

自瀉金波滿玉盤
使君沈醉不爲難
新馱二七如花女
又向春風一笑看

酬殿卿寄惠達摩渡江圖

西來遺影少林傳萬里風波一輩前今日更因阿堵妙
知君已解祖師禪

贈左史

蘭陵美酒日長携趙女秦箏玉柱低爲問游梁何所作
平臺左史醉如泥

伏日左史初度寄懷

二首

當年曼倩負仙才此日金門割肉回自罷文園長病渴
偷桃好寄故人來

其二

帝子華筵上客開千金爲壽在平臺如何此日偏相憶
幾度同銜避暑杯

寄贈梁伯龍

彩筆金花賦別離玉壺春酒調吳姬金陵子弟知名姓
樂府爭傳絕妙辭

寄送方山人歸歙州

二首

河水悠悠鴈影長長安回首淚成行可憐三十年前客

明日扁舟是故鄉

其二

白髮慘慘對雪垂
北風吹入鴈聲悲
已知客裡黃金盡
杯酒相看好似誰

東徐子與

吳姬半醉月當壚
握手王郎問酒徒
聞道君家雙妾妾
一時同唱鳳將雛

立春日

樽前華髮影毵毵病客思鄉總不堪一自倦遊三十載
那知春色在江南

寄贈元美

寒巖摘耳石峻增下有波濤氣鬱蒸知汝清齋常自愛
不當持供五湖僧

右石耳

美人持贈虎邱茶起汲吳江煮露華龍井近來還此種
也堪清賞屬詩家

右龍井茶

九疊風生障子深
蘭臺上客賦披襟
休疑古蔓龍蛇走
猶帶松杉十里陰

右藤障子

鸚鵡雙飛白玉盤
金漿一瀉萬珠寒
故人自有相如渴
明月煩君掌上看

右螺杯

李柱史蜀扇

明月團圓掌上開清風猶自灑西臺誰將一片峨眉雪
濯錦江寒萬里來

答贈沈孟學

四首

浙江潮落海門高王氣千年照彩毫有客已成枚叔賦
無人更羨廣陵濤

其二

海門中斷出吳關北望江流九折還一日故人携酒處
白雲千載鳳凰山

其三

西湖一片白雲秋影落孤山水上浮君自神仙誰不見
月明同在李膺舟

其四

江城春盡盡飛花花拂青樽日影斜寂寞更無寄字問
可知曾到子雲家

寄憶殿卿

江南行色照青春白髮相看夢裡新憶爾故鄉歸未得

梁園風雪正愁人

將至梁園寄殿卿

誰擅梁園作賦才
只今枚叔在平臺
春風好爲傳消息
恰是相如漢署來

六言律詩

郡齋同元美賦得遺字

城上西山黯黯齋
中秋草離離風塵微
祿相誤踈拙除
書自遺落日故人對
酒白雲仙吏裁
詩蕭條回首何處

徒倚論心此時

初度日子與過署中同賦

東海鍾靈此日西方誕聖彌旬玉清老子同姓金粟如
來後身佳客稱觴上壽新詩落筆生神度江我自知己
下榻誰爲故人

六言絕句

同元美賦得寒字


秋風華髮相得落日青山自寒薄宦何如濁酒故人誰

在長安

醉示元美

拂衣不免違俗縱酒還堪達生偶爾故人握手看他豎

子成名



滄溟集卷十四